


**AWIG - AWIG
DESA ADAT KAYANG
DESA KAYUBIHI**



**KECAMATAN BANGLI
KABUPATEN BANGLI**

F I D A G I N G

MAKA BANTANG AWIG-AWIG DESA ADAT BANJAR KAYANG

MURDA CITTA	WIDANG
SARGA I ARAN LAN WEWIDANGAN DESA	1
SARGA II FATITIS LAN PAMIKUKUH	1
SARGA III SUKERTA TATA PAKRAMAN	2
Palet 1 Indik Krama	2
Palet 2 Indik Prajuru	5
Palet 3 Indik Paruman	7
Palet 4 Indik Kulkul	9
Palet 5 Indik Druwen Desa	9
Palet 6 Indik Sukerta Pamitegep	10
Kaping 1 Karang Tegal	10
Kaping 2 Wewalungan	11
Kaping 3 Ehaya	12
Kaping 4 Indik Pariwertti	12
SARGA IV SUKERTA TATA AGAMA	13
Palet 1 Indik Dewa Yadnya	13
Palet 2 Indik Rsi Yadnya	17
Palet 3 Indik Pitra Yadnya	18
Palet 4 Indik Manusa Yadnya	18
Palet 5 Indik Bhuta Yadnya	19
SARGA V SUKERTA TATA PAWONGAN	19
Palet 1 Indik Pawiwahan	19
Palet 2 Indik Pasah Merabian	20
Palet 3 Indik Sentana	21
	Palet 4

	Palet 4 Indik Tetamian	21
SARGA	VI WICARA LAN PAMIDANDA	22
	Palet 1 Indik Wicara	22
	Palet 2 Indik Pamidanda	24
SARGA	VII NGUWAH-NGUWAHIN AWIG-AWIG	25
SARGA	VIII P E M U P U T	25

SARGA VII

PAMIDANDA LAN PAMIDANDA

Palet 1

MURDHA - CITTA

Om Awig-nas Antu Rana Sidhan

Antuk panugraha Ida Sang Hyang Parama Wisesa nana Krama Desa Adat Kayang, Kayubihi, Kecamatan Bangli, Kabupaten Daerah Tingkat II Bangli susatya ngawitin paruman

ring : Rahina Buda Wage Wuku Ukir Sasih Kelima.

Titi tanggal : 15 Isaka Warsa 1913

Tanggal masehi : 23 Oktober 1991 maka don nata nyuratang Awig-awig.

Maka pengelantur peparuman-peparuman Juru pengerencana Awig-awig katutun antuk pamidadab Paadatan ring Propinsi Bali, Kabupaten miwah Kecamatan Bangli, saha rikala paruman Krama Desa Adat ring : Rahina : Anggara Umanis Sasih Ke enem Titi tanggal: 12 Isaka warsa 1913 Tanggal masehi 19 Nopember 1991 presida kararemin kamanggehang Awig-awig Desa Pekraman maka sepat siku-siku pameneng kadi ring sor puniki :

SARGA I

ARAN LAN WEWIDANGAN DESA

Pawos 1

- (1) Desa Adat puniki mewasta Desa Adat Kayang ;
- (2) Jebar Kakuub wewidangannyane mewates nyatur :
 1. Sisih Wetan / Kangin : Desa Adat Antugan.
 2. Sisih Kidul / Kelod : Desa Adat Kubu.
 3. Sisih Kulon / Kauh : Desa Adat Buungan.
 4. Sisih Lor / Kaler : Desa Adat Kayubihi.
- (3) Wewidangan Palembang Desane kawangun antuk Banjar Kayang kemawon tur maning kapah dados 3 (tigang) Tempek ;
 1. Tempek Kelod kawangun antuk warga tempek kelod ;
 2. Tempek Kaler kawangun antuk warga Tempek Kaler ;
 3. Tempek Tengah kawangun antuk warga tempek tengah.

SARGA II

PATITIS LAN PAMIKUKUH

Pawos 2

Desa

Desa Adat Kayang ngemanggehang pamikukuh :

1. Pancasila ;
2. Undang-Undang Dasar 1945 pamekas pasal 18.
3. Tri Hita Karana manut tatuaning Buana Agung.

Pawos 3

Luir petitis Desa Adat Kayang :

1. Asli kukuh miwah ngerajegang Agama Hindu ;
2. Asli kukuh Awig-awig sima kerta, pasuara ;
3. Ngerajegang pasukertan desa saha pawongannyane sekala kelawan niskala.

SARGA III

SUKERTA TATA PAKRAMAN

Palet 1

Indik Krama

Pawos 4

- (1) Sane kasungguh Krama Desa Adat Kayang inggih punika Idadane Lanang wadon, teruna teruni sane nyungkemin Kahyangan Tiga Desa Adat Kayang ;
- (2) Sejaba puniki sinanggeh tamiyu ;

Pawos 5

- (1) Krama Desa Adat wenten 2 soroh luire sane sampun merabi, tur sane lanag kesungguh Desa lanang, miwah sane istri kesungguh desa istri ;
- (2) Krama Desa balu inggih punika warga sane durung merabian utawi tan mederbe rabi menawita sangkaning pasah wiadin sinalih tunggil kepademang warga Desa pratisentana sakeng krama desa Adat ;
- (3) Pesaran Teruna bunga, inggih punika pratisentana Desa Adat sane sampun mayusa deha kesungguh pasaran miwah teruna kasungguh teruna bunga.

Pawos 6

Pawos 6

Kawit dados Desa Adat :

- (1) Mawiwit ngalinggihin karang kerti, antuk tata acara ;
- (2) Mewiwit jumenek mapaumah ring sawidangan palemahan Desa Adat Kayang ;
- (3) Melarapan antuk pawiwahan pratisentana wiwit angka (1) miwah (2) ring ajeng.

Pawos 7

Panemayan ngarama Desa Adat :

- (1) melarapan antuk pawiwahan warga Desa Adat lanang maletan 42 rahina risampun upakara pabyakala/widhi widana ;

Pawos 8

Sehananing Warga Desa keni ayah-ayah :

- (1) Ayah ngarep sakeng krama Desa Adat ;
- (2) Ayah balu utawi nyibakin sakeng krama Desa ;
- (3) Ayah roban sakeng pesaren truna bunga.

Pawos 9

Tetegenan Warga Desa :

- (1) Patut setinut ring daging awig-awig, paswara/Sima kerti, miwah sehanan perarem Desa ;
- (2) Krama Adat keni ayah miwah pepeson sejangkepnyane manut pasuaran ;
- (3) Krama Desa keni ayah lan pepeson manut perarem.

Pawos 10

Swadarmaning warga, sewosan ayah-ayah luire :

- (1) Krama Desa Adat, krama Desa lan pesaren Teruna Bunga :

1. Dreda tuang ring Desa ;

2. Tan

2. Tan maran ngutsahayang mangda Desane prasida nyujur anut patitis ;
3. Patut mesadok ring prajuru adat/Dinas prade :
 - a. Madruwe Oka wawu embas utawi dehe teruna kawarangang menawita kelilayang kepadik, ngerorod wiadin kejangkebang masengker/maletan aselid ;
 - b. Ngajak wong dadudukan masundulang raga, ruang pastika jenek lelawasan nyami mulih kedaha/teruna, nampi samin jantos mekolem utawi ngajak tamu lepas ring drestaning pakulawangan, miwah sane lianan manut dresta ;
 - c. Kalayu sekaran utawi kepademan.

(2) Krama sane ngalak/ngerobang jatma kadi ajeng patut suma kuta tanggung negenang lampah nyane arepe ring kasukertan desane ;

(3) Tamu luire patut :

1. Tinut ring tatiwak desane ngupadi sukerta sakeh ;
2. Tan wenten tungkas ring sepemargin kerta Desane ;

Pawos 11

Petias utawi Olih-olihan warga Desa.

- (1) Polih pesayuban prajuru ngemanggehang luir patitis tutur kebawosin saha katiwakin pamutus wicaranyane ;
- (2) Nyarengin paruman Desa/Banjar saha wenang ngendagang adnyana karsa miwah mastikayang pamutus ;
- (3) Kengin mapuankid, nyada, nyuksikin, luput manut kadi ring sor :
 1. mapuankid prade : mapawangunan, mayadnya, matepetin miwah kaluwasaan anut sengker-sengker rahina ;
 2. nyada, prade pratisentana krama Desa Adat sane pinih alit sampun merabian/ngelad penuku ;
 3. nyuksikin utawi nyelidinin ayah prade ayah rainane pasah merabian utawi sinalih tunggil kepademan tur sane kedadosang risampun anom miwah mayusa tan kirangan ring 17 tahun utawi sampun merabian.

4. Luput

4. Luput bacakan nyane luire : luput ayah, luput berana tur maning sane kapatutang polih :
- sang sakit tahunan polih luput ayah wantah atiban ;
 - sang cedangga banget ;
 - sang kawelas asih, minakadinnyane anak alit ubuh ;
 - mosh sane lianan, tur soang-soang pemargin leluputan inucap manut drestalan perarem.

Pawos 12

Munguing pidanda sane ketiwakang ring :

- Sehanan warga Desa sane kecihnan murug tempal dura cara piwal ring sedaging awig-awig pasuara miwah perarem keni katiwak pamidanda masor singgih anut kasisipannyane antuk silih tunggil krama ;
- Penanggapan karang kerti kecabut mewali kedesa adat riantukan :
 - tan wenten ayahan wiadin urunan sekadi patut (. pararem) ;
 - Desa Adat ngererehang pemargi manut waris.

Pawos 13

Wusan dados krama luire :

- Sangkaning megingsir genah kedura desa, kedulurin antuk nunas panugrahan pailikitan prajuru ;
- Kawusang utawi kanorayang yan matanah kererehang waris sane patut ;
- Sang wusan mekrama tan polih pah-pahan sangkaning druwen Desa/Banjar.

Palet 2

INDIK PRAJURU

Pawos 14

(1) Sane

(1) Sane kasengguh Prajuru Adat inggih punika :

1. Kelian Desa Adat, penyarikan lan pangliman Adat (sinoman);
2. Wakil-wakil Prajuru Adat ;
3. Masa utawi suwe dados prajuru adat 5 warsa sejaba sinoman.

(2) Tata cara ngadegang :

1. Prajuru adat ke adegang sakeng pemilihan ring prumang Desa Adat manut dudonan/tujuan Krama Desa Adat melarapan saha mawit nunas panugrahan Ida Hyang manut dresta;
2. Wakil Prajuru kekepitan dudonan prajuru adat saha risampun kecumponin antuk krama Desa Adat, kadulurin taler nunas panugrahan Ida Hyang ;
3. Prajuru lan wakil-wakilnyane kausahayang mangda uning ring sulur saha tata cara ring adat agama lan rasan tetimbang (pengelokika) tan cedaangga lan ceda budi utawi tan kapialang antuk uger-uger panegarane(Peraturan Perundangan).

Pawos 15

Swadarmaning Prajuru Desa Adat luire :

(1) Prajuru Adat :

1. Waluye Panunggalan peragayan warga Desane, sejeroning ngupadi diging patitis lan pamikih ngemanggehang Adat Agama mehawinan prasida ngewakilin Krama Desa Adate metemuang bawos ring sapa sira ugi ;
2. Ngenterang pengelaksanaan sedaging awig-awig, pasuara lan perarem Desa ;
3. Nuntun saha ngaksinin Tata Cara miwah sanggaskaraning kauripan mabuat sane ngilitang sulur pakulawargan ;
4. Mawosin saha niwakang pamutus marep ring wicaran warga Desa Adat sejeroning Desa Pakraman.

(2) Wakil Prajuru Adat patut :

1. Nyangga nyeranain Prajurune lianan ;
2. Ngambel saha nureksain arta berana druwe Desa Adat antuk likita pastika utawi pinaka pengemong druwe Desa Adat.

Pawos 16

Pawos 16

Petias Utawi Olih-olihan Prajuru luwire :

1. Nerima saiban ritatkala wenten yadnya ring Desa Adat ;
2. Miwah Petias sewos manut Dresta lan Pararem .

Pawos 17

(1) Prajuru kagentosin, riantukan :

1. Seda ;
2. Pinunas nyane ;
3. Kenorayang ;
4. Masa dados Prajuru sampun panemaya.

(2) Ngenorayang prajuru mejalaran antuk pararem maka pamutusing sadaruman Desa Adat.

Palet 3

Indik Paruman

Pawos 18

(1) Bacakan Paruman Luwire :

1. Paruman Desa Adat kaenter antuk Prajuru Desa Adat ;
2. Paruman tempakan kaenter antuk kelian tempek ;
3. Paruman Prajuru Truna kaenter antuk kelian Desa Adat ;
4. Paruman Pararem Truna kaenter antuk Kelian Pararem Truna Bunga ;
5. Paruman lianan kaenter antuk Prajuru Adat.

(2) Paruman inucap Kawentenang :

1. Paruman Desa Adat. angken Ngobasih rikala rahina Anggara Kasih.
2. Paruman-Paruman lianan kawentenan manut tetujon nyane saha kaenter antuk prajuru manut keanan.

Pawos 19

Pawos 19

Sehanan Paruman manut dudonan :

- (1) Prasida lumaksana risampun ketedunin antuk sang patut nyarengin, maduluran suaran kulkul, saha abusana nyelempot tur maning patut nganutin genah saha cane.
- (2) Pengawit kelaksanayang penyacak sep-sepan saha riwusanania nyacak Dedosan.
- (3) Tan maren kemanggala ngarjana ring Ida Bagawan Penyarikan maka serana widi widana Cane.
- (4) Pamutus kautsahayang melarapan antuk gilik saguluk utawi briuk siubilih tan nyidayang suarane makehan sinanggeh pamutus.

Pawos 20

- (1) Sajroning paruman Desa Adat patut kasiarang pamargin ngenterang Desa luire :
 1. Munjuk lungsuring pakraman, makadi ayah-ayaha, sulur arta berana, druwe Desa, lan sewosan punika ;
 2. Rencana Prajuru nganinin usaha Desane kepungkur ;
 3. Sehanan Wicara saha pamutusnyane lan seos punika :
- (2) Sehanan kesiarang ring ajeng ketitenin saha ketiwakin pemutus antuk paruman Desa Adat ;
- (3) Pamutus paruman Desa sinanggeh Pararem sane ngawiwenang mutusang pemargin Desa Adat utawi maka pamitegep pemargin Awig-Awig.

Pawos 21

- (1) Paruaman Prajuru patut kawentenang senistanie ngesasih sepisan ;
- (2) Paruman inucap katuntun antuk Kelian Desa Adat, saha kemiletin antuk sehanan Prajuru Desa ;
- (3) Paruman Prajuru kawenangannya wantah ngerincikang tata upaya ngelaksanayang usaha miwah pengrencana-pengrencana ;
- (4) Sehanan rerembungan utawi rerincikan bilih-bilih rencana sane pacang niwakang tategenan ikrama tan wenang kamargiyang sadereng kapikukuh antuk paruman Desane.

Palet 4

Palet 4

Indik Kukul

Pawos 22

- (1) Kukul ring Desa Adat Kayang magenah ring Pertengahan Desa ;
- (2) Tabuh tetepakan kukul inucap masiosan manut tatujon, luwire ;
- (3) Tatenggeran tedun ngayah saha pemargin ilen-ilen Desa Adat duang (2) Tuludan ;
- (4) Tatengeran kepancabaya, lawase, saha sapanginangan utawi bulus ;
- (5) Tengeran sinalih tunggil warga Desa Adat Seda Suaran Kukul tigang (3) kelentungan lambat pinaka kukul pitahu, (3) tigang kelentungan lambat malih nedunang Banjar.

Pawos 23

- (1) Kukul Desa tan wenang ketepak yan tan sangkaning pituduh prajuru, sajawaning tenggeran kepancabayan ring ajeng sane katepak antuk sang ngawikanin ;
- (2) Sang nepak tan sangkaning pituduh patut digelis atur supeksa maka pabuatan panepake yan tan mangkana kadande manut pararem sapunika taler pamidandane yan tan nepak anut wiguna ;
- (3) Tengeran kepanca baya patut ketedunin antuk sehanan ayahan saha gegawan anut rupan bayane.

Palet 5

Indik Druwen Desa

Pawos 24

Padruwen Desa Adat Kayang Luwire :

- (1) Wewangunan suci, makadi priangan-pringan penyiwian Desa Adat, jangkep Pretimenye saha serana pebaktiyan ;
- (2) Bale gong, Bale Desa Adat, Wantilan Desa Adat, Bale Kukul, saha sane liyanan ;
- (3) Tanah Pura, inggih punika tanah Desa pinaka tanah kerti ;
- (4) Setra apelebahan ;

(5) Gong.....

- (5) Gong Desa Adat ;
- (6) Jinah druwe Desa Adat wit pikolih lelangan krama Desa Adat sami ;
- (7) Arta brana panjangan sangkaning pedana punian saking krama Desa Adat utawi tininggal pati saha caput putung.

Pawos 25

- (1) Kawigunan tanah Desa utawi karang kerti ketanggap antuk suang-suang krama Desa Adat, sejawaning kewangun kayangan Desa saha druwe pura miwah wewangunan Desa Adat ;
- (2) Prajuru wenang ngetangang padruweyan Desa saha ke kesiyarang nyabran paruman antuk ilikita pastika.

Palet 6

Sukerta Pamitegep.

Kaping 1
Karang Tegal

Pawos 26.

- (1) Karang Desa Adat sane kegenahin paumahan soang-soang krama Desa Adat kasungguh karang kerti maka genah ngertiang raga sekala niskala, turmaning wantah paweweh Desa Adat maka cihna wala ketanggapan (hak pakai).
- (2) Sasukatan karang kerti sane ketanggap, luire :
 - 1. Asuluh balangan /sikut 250, jimbar palih genah sanggar pedadian umah saka 4 (pat) paon, kerumpu miwah ketungan manut dresta ;
 - 2. Suluh balang alit, kenginan wantah wewangunan umah lan pamungun karang.
- (3) Karang Kerti katata wangun saha kawigunayang, saha kaparitatas olih Prajuru maka pararem kerama Desa Adat, saha mabukti ilikita pastika.

Pawos 27

Tata trepti nanggap karang Kerti luwire :

- (1) Krama Desa Adat sane nanggap patut ngewatesin karang inucap antuk pagehan wiadin tembok, pinih utama sane marep kemarginin mangda pekantenannyane asri, tegap matugu panunggun karang ;

(2) Watese.....

- (2) Watase sisih kaler miwah kangin patut kekeryanin antuk sang madruwe karang, mapiteges gagalengan keluan prade genahe majepitan sajawaning mawates nyatur Desa wantah kategen antuk sang naggap, sewaliknya tegal utawi carik patut magaleng kateben, nganinin indik wates, watase sisih kelod utawi kauh kapiara sang madruwe tegal/carik ;
- (3) Prade kerasayang ngawininang pocol utawi ngeleتهin karang penyandinge, patut kaiuguman mungguwing batese inucap ;
- (4) Sang naggap patut nangun swadaya usaha, ngupadi kertinya nyujur kasukertan sekala niskala ;
- (5) Tan wenang :
 1. Kadure care, karug-rug kausak-asik, tate saha wangunan nyane, yantan sida nggaskara manut dresta saha pararem ;
 2. ngalelet utawi mendem saluire barang sane ngeleتهin sejeroning karang, bilih-bilih yan kaleتهane ngelimbak ke desa adat.

Kaping 2

Wewalungan

Pawos 23

- (1) Sane kasungguh wewalungan sakeng bawi ngemunggang ;
- (2) Sehanan Warga Desa sane miara wewalungan, patut sayaga nitenin negul utawi ngelogor, mangda tan ngarusakin karang utawi paabyanan krama tios, bilih-bilih jantos ngeranjing /ngeleتهin kahyangan ;
- (3) Prade wenten wewalungan ngeleb tur anut sekadi ajeng patut mapalungganghing sang mederbe lantur kesadokang ring prajuru mangda kebawosin .

Pawos 29

Tata Caraning Naban Wewalungan

- (1) Wewalungan keni taban prade ngeleb :
 1. ngerusak pekarangan sewosan lintangan ring ping 3 ;
 2. ngeranjing kekayaan.

(2) Sang

(2) Sang naban patut :

1. mesadok ring prajuru adat :
2. miara wewalungan inucap sepatutnyane.

(3) Sang madruwe wewalungan patut :

1. nawur prabeya ring sang naban anut pengelokika prajuru ;
2. prade tan wenten mariangken kengin kadruweang antuk sang naban risampun masengker ring pesadoke.

Kaping 3

B a y a

Pawos 30

(1) Bacakaning baya wenten panca baya, luire :

1. jiwa baya, kabaak, kebeggal, lan sepenunggalannya ;
2. arta baya, kemalingan ;
3. geni baya, ketunuan/umah puhun ;
4. plegandangan pamekas ;
5. dura cara ring agama.

(2) Sehanan warga Desa sane uning ring wenten jatma utawi kehanan baya patut atur uning ring prajuru adat/dinas tur nepak kulkul mapitulung anut pawos 22 angka (4) ;

(3) Warga Desa sane keicalan utawi arta baya tur pacang maseserep patut nunas pituduh ring prajuru/Kelian Dinas.

Kaping 4

Indik. Pariwertu

Pawos 31

(1) Sahanan Warga Desa Adat tan Kapatutang majejemuhan, ngutang laluhu, mebacin ring margi agung tur ring genah sane neten tan kapatutang sane praside ngicalang Pasukertan Desa Pakraman.

(2) Krama

- (2) Krama Desa patut mererosik ring sajeroning setra Adat saha nandur sarwa sari mangda setra inucap pekantenannya asri.
- (3) Telajakan karang sane majeng ke Margi Agung, Merajan, Karang sikut satak patut kapiara nyabran rahina tur katandurin sarwa sari.
- (4) Sahananing Warga Desa Adat patut mebersih-bersih nyabran rahina ring karang paumahan sami sakeng telajakan ring ajeng rawuhing got/kekalen lan margi Agung.
- (5) Sahananing Warga Desa Adat kepatutang madruwe genah mebacin utawi WC.
- (6) Sang sapa sira ugi sane mamurug pidabdab inucap patut keni pamidanda manut uger - uger sakeng Pemerintah.

Pawos 32

- (1) Sehanan warga Desa sane polih nuduk barang sewewengkoning Desa Adat Kayang patut atur supeksa ring Prajuru Adat lan Dinas ;
- (2) Sang mariangken patut nyihnayang mungguing punika wantah druwenyane ;
- (3) Prade jantos asasih tan wenten mariangken risampun kasiarang antuk Prajuru sejeroning paruman utawi upacara Yadnya, barang dadudukan inucap wenang kedruwe antuk nuduk.

SARGA IV

SUKERTA TATA AGAMA

Palet 1

Indik Dewa Yadnya

Pawos 33

- (1) Palinggih panyiwian Desa Kayang luire :
 1. Kayangan Desa pamekas Tri Kayangan : Pura Desa, Puseh saha Dalem ;
 2. Pura Kayangan Desa sewosan.
- (2) Pengaci ring D. inu... nista media, utama manut kawentenan lan perarem taler antuk pituduh sane kawedar antuk Parisada Hindu Dharma Indonesia.

Pawos 34

- (1) Dewa Yadnya sejeroning Desa Adat katuntun antuk Prajuru Adat ring sakalane sakewanten pemargin niskalane ming singsinghihang pemagku, kesanggra antuk pesarin teruna bunga, prasuri/premas Adat ;
- (2) Ngadegang pemangku lan penyangranne patut :
 1. Prade Pemangku Adat, minakadinya mangku Puseh, Desa, Dalem :
 - a. mawiwit sakeng krama Desa ;
 - b. Mejalaran jejemputan Ida Hyang ;
 - c. kecumponin olih Krama Desa Adat raris kewintenin lantur magentos parab anut pura sane kaenterang saha angrangsuk busana sarwa putih ;
 2. a. Pemangku seda patut keabenang olih suang-suang pengempon utawi Desa Adat ;
b. Pemangku sane patut keabenang wantah sane lanang sane kaseleng.
 3. Prabeya pengabenan asiki pengempon/Desa adat atenga Warga Sira Mangku (1 : 1/2) turmaning pemargin yadnya patut kesangra antuk pengempon/Desa sane kaenterang olih Prajuru.
 4. Prade Kelian pesaren teruna bunga :
 - a. mewiwit sakeng krama Desa ;
 - b. polih panugrahan Ida Hyang ;
 - c. kacumponin raris keprayascita manut dresta antuk Krama Desa Adat.

Swadarmaning miwah tetegenan pemangku lan penyangranne :

- (1) Pemangku kayangan tiga :
 1. nentepang wangun saha ilen-ilen piodalana kayangan Desa sareng Prajuru ;
 2. nyoroh bebanten yadnya sepatutnyane ;
 3. ngeresikin

3. ngeresikin palingih - palingih saha sarana sinanggeh suci.

(2) Kelian Pasaren Trona Bunga :

1. mereresik sedurung upacara piodalan ring kahyangan Desa ;
2. ngenterang pesaren Trona Bunga manut Dresta.
3. Ngardi gaguwet-gaguwet mabuat nganinin indik pasuka dukaan, lan siosan punika.

(3) Presuri Adat :

1. Mereresik sedurung upacara piodalan ring kahyangan Desa Adat ;
2. Ngaturang pakeling antuk pemargin-pemargin yadnya sekadi patut manut dresta ;
3. Ngucapaken Sumpah Upacara pawedal, saha liman manut dresta .
4. Asuci laksana. bakti paged ngastiti Hyang mangdona praside kepangguh kerahajengan Desa Adat miwah palinggih manut dresta.

(4) Tetegehan sane patut kelaksanayang antuk :

1. Pemangku-Pemangku Adat :
 - a. Wewedalan peturunan tan keluputang ring kahyangan sane kaenter ;
 - b. tetegehan sewos manut dresta.

Pawos 36

Olih-olihan utawi petias Pemangku lan penyangrane :

(1) Pemangku adat polih :

1. nerima pengolem, bebaisan, sesari, segantun.

Pawos 37

(1) Pemangku kegentosin riantukan seda utawi kenorayang :

(2) Pemangku adat sinalih tunggil kawusanang utawi kanorayang, antuk pararem maka pamutusing paparuman Desa Adat.

Pawos 38

Kasucian kayangan kadi ring sor :

(1) Tan kalugra ngeranjina ke pura :

1. Sang sebel kandel luwire :

- a. Ngeraja swala gumentos bersih anut senger ;
- b. Ngebasang Putra, pawanengannyane nyiabrahma (9 rahina) sebel desa lanang, 42 rahina Desa/istri miwah jantos patigang sasihan okane inucap ;
- c. Sang alaki rabi (pengantenan) risampun kemargiang upacara pabya kala/masagan keni sebel wantah pengantenan kemanten.

2. Cuntaka kepademan, luire :

- a. Selami saking patunggalan 12 rahine sang ngarepin, prade sang lampus sampun kepus odel.
- b. Prade durung kepus odel utawi keruron, sang ngarepin 42 rahina miwah patunggalan padadian 12 rahina.
- c. Salah, ulah pati, anut senger.

3. Sang kasinanggeh reged luire :

- a. Jatma sane lumaksana gamiya gemana.
- b. Sahanan jatma patita, luwire : pianak babinjet, wong beling tan sinanggaskara, wong mamitra galang, wong sakit ila, buduh, miwah cendala siosan, sadurung kalukat keprayascita manut agama.
- c. Jatma sane kepastiang janten utawi cedangga, ngelesaning, ninggal agama, kenarayang/kapaing, ngerusak wewangunan suci saha sane lianan manut dresta.

4. Sato agung ngawit bawi ngamunggahang, sajwaning rikala mayadnya kadulurin antuk nunas panugrahan Ida Hyang Widi (mangda dijabaan dumun).

5. Sahanan barang sinanggeh ngelethin manut agama luwire : tulang, getih, bok, saka luwiwitan watang layudan pitra yadnya.

(2) Prati laksanakanane tan wenang ring Pura :

1. Tan abusana sane patut kadi karangsuk rikala pabaktian luwire : destar, kelambi, anteng, wastra lepas, sane bersih ;

2. Memisuh

2. Memisuh kalih wakparusya siosan, me-jaljal, megerengan, bilih-bilih yan jantos metu rah ;
3. Mekobetan, mewarih, mesenggama miwah prawertine ala sewosan ;
4. Munggah tedun penataran pelinggih-pelinggih kahyangan Desa, sejawaning sane kepastikayang antuk prajuru luwire : Pemangku-Pemangku, Lelian pesaren Truna Bunga/pesare, prasuri lan Prajuru sane sampun kawin tenin/kaprayascita ;
5. Pengaturan-pengaturan sesolahan sane keruntutin antuk : vidio, tape rekorder lap;
6. Sane kebaos nyorah utawi sinanggeh saruron ring wong corah, prade tan nyadokang kauningan wenten melaksana ala sajeroning kahyangan ring Prajuru Adat.

(3) Sang sinanggeh ngawinayang dus kerta, luwire :

1. Wong salah tempal (jatma mesenggama ring wewalungan) ;
 2. Gamia gemana ketelanjur ;
 3. Panguman-uman ring Desa ;
 4. Miwah sahanan sane ngeletehin manut linggih agama swadarmaning tan memarisuda Desa.
- (4) Pemargi-pemargi yadnya sejabaning kamanggala olih Desa Adat Sang ayat meyadnya mangda mapiuning ring Prajuru Adat.

Palet 2

Indek Rsi Yadnya

Pawos 39

- (1) Sang jagi ngewangun yadnya kawikon/dulu patut nunas panugrahan ring sang rumawos (Parisada lan Pemerintah) mesadok ring prajuru Adat.
- (2) Prajuru inucap patut sareng nuriksain nitenin mangda sulur kalih pemargine manut kecaping agama.
- (3) rajuru ,patut matur uning ring sang rumawos prade wenten indik-indik sane karner, kadulurin antuk cihna manut Tri Pramana .

(4) Sapupute

- (4) Sapupute, prajuru patut digelis ngentosin parab sang diniksa ring sehanan ilikita antuk biseka kawikon manut panugrahan nabanye, saha akesyarang ring paruman Desa Adat.

Pawos 40

- (1) Warga Desane soang-soang sumakuta ketuntun antuk prajuru adat patut sareng ngawas nitenin mangda sehanan yadnya sane kewentenang kaicen pemuput olih para Pandita/Pinandita manut kewenangannya soang-soang.
- (2) Prajuru patut nuntun saha ngemanggalain Krama Desa Adat mikukuhin kesucian linggih dulune.

Palet 3

Indik Pitra Yadnya

Pawos 41

- (1) Pitra Yadnya matetuwek ngawentenang yadnya bakti pinaka jangkepin swadarmaning Putra sesana, ngardi kasucianing Sang Hyang Pitra ring sekala niskala.
- (2) Mungguing tata wangun saha pengelaksanannya masesuluh ring sastra dresta twi ring pituduh-pituduh Sang rumawos (Parisada Hindu Dharma).

Pawos 42

- (1) Sang Pacang ngangge setra patut nunas uwak-uwakan ring prajuru saha tata ngangge manut dresta miwah pituduh-pituduh prajuru.
- (2) Warga Desane patut nitenin mangda sehanan letuh setrane tan wenten ngelalah/kebakta ke Desa pekraman bilih-bilih ke Kahyangan.
- (3) Prade wenten sawa wong Desa sios pacang ketunjel / kependem ring setra Adat, prajuru patut maparuman mutusang indik dados tan dados manut dresta, makadi pananjung batu.

Palet 4

Indik Manusa Yadnya

Pawos 43.

- (1) Manusa Yadnya metetujon merayascita bacakaning karegedan jatma warga Desa sekala niskala, antuk sanggaskara. Sanggaskara Yadnya ngawit sakeng rare sejeroning garban ibunya tumeke ripanemaya patinia riwekas.

(2) Wangun

- (2) Wangun saha bacakaning yadnya sane ketangun nista, madia, utama manut agama lan dresta.

Fawos 44

- (1) Manusa yadnya patigang sasihan pastika patut ketangun sinalih tunggaling warga Desa ring rarennya (Oka alit) ;
(2) Upakara - upakara manusa yadnya sewosan, indik tata wangun miwah pemargin yadnyane manut agama dresta saha pituduh - pituduh Prajuru Adat.

Palet 5

Indik Bhuta Yadnya.

Fawos 45

- (1) Bhuta yadnya matetuwek ngawentennang punia karma ring watek bhuta utawi babutan ring sekala twin niskala ;
(2) Bhuta yadnya sewengkonin Desa Adat Kayang patut pastika pacang kelaksanayang sekadi patut manut dresta ;
(3) Munggwing tata wangun, pengelaksanannya saha pagenahannya sejeroning wewidangan Desa sampun pastika manut dresta.

Fawos 46

- (1) Bhuta yadnya lianan ring sane manut dresta, patut keutamayang ugi pemargin nyane manut pituduh sang rumawos (Parisada Hindu Dharma) ;
(2) Bhuta yadnya sejeroning rerainan jagat luwire : Pagarwesi Nyepi, Galungan, Kuningan, Tumpek Pengatag, Tumpek Andang/Uye saha sane lian-lianan pastika patut kemargiang antuk krama Desa Adat twin Warga Desa Soang-soang.

SARGA V

SUKERTA TATA PAWONGAN

Palet I

Indik Pawiwahan

Fawos 47

- (1) Pawiwahan Sajeroning jagat Kayang Patut :

1. Tan

1. Tan lepas ring uger-uger utawi peraturan perundang-undangan pemerintah ;
 2. Tan Lepas ring kecaping agama ;
 3. Keupakara Saha sidan, manut dresta ;
 4. Atur uning ring Prajuru ;
 5. Kecatetang ring kantor Camat/Catatan Sipil.
- (2) Pawiwahan patut kaurungang yan tan manur ring gaguwet ping ajeng utawi sajeroning awig-awig puniki ;

Pawos 43

Indik pangerorodan kadi ring sor :

- (1) Sang ngerorod pastika patut medasar antuk pada rena ;
- (2) Prade pemargine manut dresta, sang nampi lan sang ngerorod patut polih pasayuban ;
- (3) Sang ngerorod utawii sang nampi jatma ngerorod patut digelis atur uning ring prajuru lan kelian Dinas ;
- (4) Yan pamargine tan manut dresta :
 1. Kengin maseserep pacang natas pengerorodan maduluran pasadok ring prajuru adat lan dinas mangda ngicen panuntun indik pamargi sapatutnyane manut dresta ;
 2. Prajuru saha Kelian dinas patut digelis lumaksana matandang wirang ring sang katetehan saha nunusang ring sang rumawos (Polisi).
- (5) Pamidanda sane katiwakang yan tan manut pemargi :
 1. Sang ngerorod kedanda manut perarem ;
 2. Sang nampi kesungguh saruron ring corah kedanda sekadi patut ;
 3. Sang Kelian mamiseka, kasepekang sakeng wewidangan Desa Adat.

Palet 2

Indik Pasah Merabian

Pawos 49

- (1) Krama Desa Adat sane pasah merabian patut mesadok ring
1. Sasulur

1. Sasulur sane ngawinan pasah ;
2. Sakaluwir sehanan pasahe ;
3. sasulur pamuput pemargin pasahe.

(2) Prade sane kesadokang durung kepatut pepasahanen prajuru /Kelian Desa Adat patut nuntun mangda sasulur pasahe kapuputang riyin antuk numuangring sang rumawos.

(3) Risampun kacihnayang papasahane ring sang rumawos pemargin ring Desa patut :

1. ngemargiang widiwidana ring para Desa, /Sangkepan ;
2. Prajuru patut ngilikitayang sepatute saha nyiarang ring paruman desane.

Palet 3

Indik Sentana

Pawos 50

(1) Warga Desa sane pacang ngidih sentana patut mapagum ring keluarga raris matur uning ring prajuru adat lan Kelian Dinas asasih sadurung kaupakara ;

(2) Kulawarga purusa sang ayat ngidih lan sang nyentana patut napak sinarengan ring prajuru Adat/Kelian Dinas maka cihna paadungan ;

(3) Sapa sira ugi sane tan cumpu ring pamerasan punika sanistane masengker awuku sebanen Dewasa patut nunas pemutus ring prajuru Adat lan Kelian Dinas ;

(4) Prajuru Adat lan Kelihan Dinas Patut :

1. Nodia dados saksi, mungguing upacara pemerasan mrrajeg dalem manut dresta saking sang nyentana ;

2. niwakin pemutus digelis arep ring pamawos wicarane kadi angka 3 ring ajeng ;

3. Ngilikitayang sapamuput sopacaraning upekara saha nyiarang ring peparuman Desa Adat.

Palet 4

Indik Tetamian

Pawos 51

(1) Sane

(1) Sane kasungguh tetamian pinika :

1. Tetamian teka luas, inggih punika bacakaning barang-barang sane kadol atuku, kekutang, kepedanayang luwire : arta berana daging jagat sekala druwen sang matamiang utawi hutang-hutang nyane manut dresta ;
2. Tetamian suci maka cihna wewangunan suci turun tumurun, satmaka wala palit andasane pastika patut nyudi tatujon kahuripane sekala niskala, sane tan kawenang adol atuku ;
3. Tetamian anjadma, inggih punika bacakaning budi daya sane pastika sampun katerima sakeng ngawit panumadian, kapiteges sejeroning Tri Rne.

(2) Sang metamiang inggih punika sang ninggal tetamian.

(3) Sang nami inggih punika sang nerima tetamian.

Pawos 52

Tata Sulur Tami titami kadi ring sor :

(1) Sang nami patut :

1. Nerima tetamian teka luas saha tetamian suci ;
2. Nawur tetamian anjadma antuk panca yadnya ;
3. Sang ninggal Agama Hirchi tan Kapatut nami bacakane tetamian sane kesungguh ring ajeng.

(2) Tata sulur tami tinami pemerginnyane, pepalihan tetamian-tetamian lianan sane patut tan patut ketinggal sekantun sang madruwe maurip kapiteges antuk dresta manut pararem ;

(3) Napi luwir indik tami tinami sane durung keguwet iriki pemarginnyane manut dresta saha pararem.

SARGA 6

WICARA LAN PAMIDANDA

Palet 1

Indik Wicara

Pawos 53

(1) Sane wenang mawocin mekadi mutusing wicara, luwire :

1. Kelian tempek, prade sang mawicara sejeroning tempekan ;
2. Prajuru

2. Prajuru Adat, prade krama sane mawicara masewosan tempekan.
- (2) Warga Desa tan cumpu ring pamutus kelihan Desa Adat kengin nunas bebandingan ring kelian Dinas/Kepala Desa taler tan prasida puput kengin nunas bebandingan ring sang rumawos (Pamidabdab pasdatan ring kecama tan utawi katumusang ring Kabupaten/Propinsi) ;
- (3) Prade wicarane kajabaning Desa Adat, Prajurane sumakuta utawi soang-soang wenang ngewakilin Krama Desa Adate sinamian.

Pawos 54

- (1) Wicara-wicara sane mebuat patut karembug, kapaigum sejeroning peparuman Desa Adat, saha ketiwakin pamutus antuk pararem, bilih-bilih yening sane kawicaran sinanggeh ngawinang duskertan jagat ;
- (2) Wicara-wicara sane katiwakin pamutus antuk pararem, sinanggeh pamutus pastika patut kebajegang, kelaksanayang, kapikukuhin antuk warga/Krama Desa Adat sinamian ;
- (3) Panepas wicarane mangda pastika nyantenang iwang patut. melarapan Tri Pramana (saksi, ilikita, bukti) saha lan marem tepak ring catur dresta (sastra, purwa, loka lan Desa).

Pawos 55

- (1) Wicara sane sampun katiwakin pamutus kadi inucap ngelesaning, ninggal agama, kenarayang/kapaing, ngerusak wewangunan suci saha sane lienan manut kelaksanayang antuk kelihan Tempek utawi prajuru nungga nunggal ;
- (2) Pengelaksanaan pamutus pastika kadi ring sor :
 1. Wenang pakeling pangunduk ring sang katiwakin pamutus, mangda tinut saturut ring pararem Desa ;
 2. Kapatut saha kawenang wenten arah utawi pantuduh ring warga/krama Desa Adat mangda ngewangun separi polih laksane sepatutnya, saha ngardi rajeg kukuhing Awig-Awig saha Pararem-pararem.
- (3) Pamutus inucap ngupadi :
 1. Mangda Desane uning ring wewatesan iwang patut ;
 2. Mangda sang kawon uning ring keiwangannya ;
 3. Mangda sang malih tan bes nginggilang kepatutannya ;
 4. Mangda sang kawon lan sang molih lila lagawa, edoh saha mameseh-mesehan.

Palet 2

Palet 2
Indik Pamidanda

Pawos 56

- (1) Bacakan pamidanda, luire :
 1. Ayahan panukun kesisipan ;
 2. Danda Arta saha panikel-panikelnyane lan panikel-panikel urunan ;
 3. Kerampag manut dresta ;
 4. Upakara penyangaskara, pemerascita ;
 5. Kapasahang lan kenorayang / kawusang mekrama.
- (2) Peniwak inucap mesor singgih manut kasisipannya patut sekadi ring gaguwet-gaguwet sejeroning awig-awig, dresta miwah perarem-perarem tan marem ngupadi darma kawelas arsan, pinih ajeng maka buatan kesudemalan Desa ;
- (3) Daging pamidanda kadruwe antuk tempekan - tempekan utawi Desa Adat.

Pawos 57

- (1) Krama Desa sane langkung ring tigang Paruman ngelantur ton nawur urunan miwah dedandan wenang kerampag ;
- (2) Ngerampag kemargiang manut pamutusang paruman Desa ;
- (3) Tan kalugra rinampag, luire :
 1. Artha sane sinanggeh suci manut dresta ;
 2. Artha sane ngicalang cihnan kemanusan ;
 3. Punapa-punapi sane mademang pangupajiwana sang kerampag.
- (3) Tata cara pengrampag kadi ring sor :
 1. Atur uninga ring kelian dinas serauhing Kepala Desa pengawiwenang Desa Dinas ;
 2. Sang ngerampag sang kaning darsana nganbil Artha Utawi nyawenin tatem tuwuh sepatute ;
 3. Sang karampag sareng nyaksinin tur tan kepatut ngalangin.
 4. Artha

4. Artha rerampagan utawi tanem tuwuh sane kesawenin pinaka rerampaggan akeh nyane manut ring utang sang kerampag ;
5. Sang kerampag polih sesengkeran 5 (lima) rahina, ring enem rahina ngawit kerampag sadereng kelelang.

SARGA VII

NGWAH - NGWAHIN AWIG-AWIG

Pawos 58

- (1) Awig-awig Desa Adat Kayang puniki sida kawawuhin antuk pararem, maka pemutusing paruman Krama Desa Adat sane kejangkepang antuk atenga langkung sakeng krama Desa Adat ;
- (2) Pamutusing atenga langkung Krama Desa Adat sejeroning paruman kesungguh pararem, pangawiwenang nguwah-nguwihin awig-awig.

Pawos 59

- (1) Awig-awig puniki sampun kamungahang gaguwet-gaguwet, maka daging pararem-pararem pemutus paruman Desa Adat Kayang ;
- (2) maka unteng gaguwet-gaguwet saha daging suksemaning awig-awig puniki wantah keketus sakeng dresta Desa Adat Lawas, sane sampun kesungkemin ring Desa Adat Kayang puniki ;
- (3) Pangewuwuh Tata wangun sasulur panyurattan awig-awig puniki masasuluh ring imba awig-awig papulan pakeling saha katuntun antuk majelis (pamidabdab paadatan).

SARGA VIII

P E M U P U T

Pawos 60

- (1) Awig-awig puniki kawastanin Awig-awig Desa Adat Kayang ;
- (2) Awig-awig puniki kemargiang ngawit keraremin.

Pawos 61

Pawos 61


- (1) Sakeluwiring sane wenten saderengnya patut keanutang ring sedaging awig-awig puniki ;
- (2) Sehananing sane durung kaguwet ring Awig-awig puniki manggeh kasungkemin cihna kerta, dresta miwah pararem-pararem ring Desa Adat Kayang.

Pawos 62

- (1) Awig-awig puniki keraremin duk rahina Anggara Umanis Wuku Wariga Titining ping 15 sasih Sada Isaka Warsa 1914 Tanggal masehi 16 Juni 1992 ring Desa Adat Kayang ;
- (2) Awig-awig puniki kelingga tanganin antuk kelian Desa Adat kesarengin antuk kelian -kelian Tempek, saha kesaksinin antuk Kelian Dinas Banjar Kayang, saha Kepala Desa Kayubihi ;
- (3) Luir sang ngelingga tanganin :

1. Kaping ajeng Prajuru Adat

1. Kelian Tempek Kelod,


I Nengah Darma.

2. Kelian Tempek Kaja,


I Nengah Mandor.

3. Kelian Tempek Tengah,



I Nyoman Syilir.

4. Kelian Desa Adat,


I Nengah Mandor.



2. Kaping Kalih pinaka saksi :


Kepala Dusun/Br. Kayang,
I Nengah Setop.


Kepala Desa Kayubihi,
I Putu Raka.



Tel ah d i c a t a t k a n
P a d a K a n t o r B u p a t i K e p a l a D a e r a h T i n g k a t I I B a n g l i

T a n g g a l : 28 A g u s t u s 1992.

R e g . N o . : 07 T a h u n 1992

